



Resolución reitoral pola que se regula a autoprovisión de bens e servizos na Universidade da Coruña

Preámbulo

A autoprovisión é unha técnica coñecida e ensaiada con éxito no sector público autonómico, logo da aprobación da Lei 14/2013, do 26 de decembro, de racionalización do sector público autonómico, que apostou con claridade polo desenvolvemento de técnicas de cooperación administrativa e, entre elas, no seu artigo 8, pola técnica de autoprovisión de bens e de servizos.

A partir desa experiencia e cos axustes debidos á singularidade do servizo público universitario, compre establecer as condicións e o procedemento de autoprovisión de bens e de servizos na Universidade da Coruña, entendida como un mecanismo de cooperación intrasubxectiva, dirixido á realización das tarefas de interese público que a Universidade ten encomendadas cos medios persoais, técnicos e materiais de que dispoña, con carácter preferente á alternativa de acudir á prestación por terceiros alleos á propia organización.

A regulación da autoprovisión respecta os principios de boa regulación, e, nomeadamente, os principios de necesidade, eficacia, proporcionalidade, seguridade xurídica, transparencia e eficiencia. Así, a presente regulación resulta necesaria e conveniente, por canto favorecerá un uso mais eficiente dos recursos públicos existentes, ao tempo que permitirá unha provisión de bens e servizos mais axeitada e adaptada á realidade da propia institución, facilmente actualizable en función de novas necesidades e dispensada con criterios de máxima solvencia técnica. Cumpre, ademais, co principio de proporcionalidade, por canto se recolle a regulación imprescindible para atender a necesidade para cubrir coa norma, limitando o uso da técnica a supostos específicos e predeterminados que deberán ser avaliados caso a caso. Aspira a xerar un marco normativo estable, predicible, integrado, claro e de certeza, que facilite o seu coñecemento e comprensión e, en consecuencia, a actuación e toma de decisións axeitadas. E, por último, a autoprovisión regúlase baixo a premisa da simplificación do procedemento e á supresión de trámites innecesarios.

Artigo 1. Autoprovisión

Cando os medios dos que se dispoñan nos servizos da Universidade da Coruña resulten insuficientes ou inadecuados para o cumprimento e realización dos fins institucionais que ten atribuídos, o/a reitor/a poderá encomendarllos a outros servizos, órganos, unidades ou persoal da propia institución, conforme ás condicións e o procedemento establecidos nos artigos seguintes.

Artigo 2. Inicio do procedemento

O procedemento de autoprovisión deberá iniciarse polo/a xerente/a, ou persoa en quen delegue, por propia iniciativa ou por petición razoada doutros órganos. Para estes efectos, será preceptivo o informe do servizo ao que lle correspondería subministrar o ben ou prestar o servizo, que xustifique a insuficiencia ou inadecuación de medios e a conseguinte necesidade da encomenda.

Artigo 3. Comisión de autoprovisión

A selección do órgano, unidade ou persoal ao que corresponda executar a encomenda será realizada por unha comisión integrada polas seguintes persoas:

Código Seguro De Verificación	I32mIePnSBC2ynTctkpwAQ==	Estado	Data e hora
Asinado Por	Reitor - Ricardo José Cao Abad	Asinado	08/10/2024 13:38:58
Observacións		Páxina	1/2
Url De Verificación	https://sede.udc.gal/services/validation/I32mIePnSBC2ynTctkpwAQ==		
Normativa	Este informe ten o carácter de copia electrónica auténtica con validez e eficacia administrativa de ORIGINAL (art. 27 Lei 39/2015).		





- o/a vicerreitor/a con competencias na materia obxecto de encomenda, que a presidirá;
- o/a xerente/a, ou persoa en quen delegue;
- o/a secretario/a xeral, ou persoa en quen delegue, ostentará a secretaría da comisión.

Artigo 4. *Compensación*

A compensación pola execución da encomenda fixarase en atención aos custes reais da súa execución, sen incluír beneficio industrial, e terá a consideración de gratificación pola prestación de servizos extraordinarios prevista no artigo 137 da Lei 2/2015, de 29 de abril, do emprego público de Galicia.

Artigo 5. *Formalización da encomenda*

A encomenda formalizarase por resolución reitoral, na que figurarán o órgano, unidade, persoal destinatario da encomenda, o obxecto da encomenda, o prazo de execución, a compensación e calquera outra condición que resulte necesaria para a súa axeitada execución.

Artigo 6. *Xestión delegada*

Poderase encargar á Fundación Universidade da Coruña, medio propio da Universidade da Coruña, a xestión da encomenda. A ditos efectos, realizarase o oportuno encargo ao amparo do previsto no artigo 32.2 da Lei 9/2017, de 8 de novembro, de contratos do sector público.

Artigo 7. *Transparencia*

A información relativa ás encomendas de importe superior a seis mil (6.000,00) euros deberá publicarse anualmente no portal de transparencia e deberá comprender, cando menos, o órgano, unidade ou persoal destinatario da encomenda, o seu obxecto e duración.

Artigo 8. *Contratación externa*

Por resolución reitoral poderanse aprobar catálogos de medios e prestacións susceptibles de ser obxecto de autoprovisión. En tal caso, só poderá acudirse á contratación externa cando a autoprovisión non resulte viable, o que deberá xustificarse no expediente de contratación.

Disposición final primeira. Desenvolvemento e interpretación desta regulación

Habilitase á/ao secretaria/o xeral a ditar as instrucións que resulten necesarias para desenvolver esta regulación e resolver as dúbidas que ocasionase o seu cumprimento.

Disposición final segunda. Entrada en vigor

Esta regulación entrará en vigor ao día seguinte ao da súa publicación no Taboleiro Electrónico de Anuncios da Sede electrónica da Universidade da Coruña.

O REITOR

Código Seguro De Verificación	I32mIePnSBC2ynTctkpwAQ==	Estado	Data e hora
Asinado Por	Reitor - Ricardo José Cao Abad	Asinado	08/10/2024 13:38:58
Observacións		Páxina	2/2
Url De Verificación	https://sede.udc.gal/services/validation/I32mIePnSBC2ynTctkpwAQ==		
Normativa	Este informe ten o carácter de copia electrónica auténtica con validez e eficacia administrativa de ORIGINAL (art. 27 Lei 39/2015).		

